

Quod autem ore legis, corde credas et opere cõpleas; quatenus auditores tuos verbo pariter et exemplo tuo docere possis. Ideoque dum legis, sta in alto loco Ecclesiæ, ut ab omnibus audiaris et videaris, figurans positione corporali te in alto virtutum gradu debere conversari; quatenus cunctis, a quibus audiris et videaris, cœlestis vitæ formam præbeas: quod in te Deus impleat per gratiam suam.

Deinde Pontifex accipit et tradit Ordinando Codicem de quo lecturus est; quem manu dextera tangit, Pontifice interim dicente:

Accipe, et esto verbi Dei relator, habiturus, si fideliter et utiliter impleris officium tuum, partem cum iis, qui verbum Dei bene administraverunt ab initio.

Tum Pontifex cum mitra surgit, et stans versus ad illum adhuc genuflexum, dicit:

**O**REMUS, fratres charissimi, Deum Patrem omnipotentem, ut super hunc famulum suum, quem in ordinem Lectorum dignatur assumere, bene ✠ dictionem suam clementer effundat; quatenus legat distincte quæ in Ecclesia Dei legenda sunt, et eadem operibus impleat. Per Dominum nostrum Jesum Christum Filium suum, qui cum eo vivit et regnat in unitate Spiritus sancti Deus, per omnia sæcula sæculorum. *R.* Amen.

Tum Pontifex, mitra deposita, stans conversus ad altare, dicit: Orémus.

Ministri subjungunt: Flectamus genua. *R.* Levate.

Deinde vertens se ad Ordinatum genuflexum, dicit sine mitra:

**D**OMINE sancte, Pater omnipotens, æternæ Deus, bene ✠ dicere dignare hunc famulum tuum in officium Lectoris: ut assiduitate Lectionum instructus sit atque ordinatus, et agenda dicat, et dicta opere impleat, ut in utroque sanctæ Ecclesiæ exemplo sanctitati suæ consulat. Per Dominum nostrum Jesum Christum Filium

tuum, qui tecum vivit et regnat in unitate Spiritus sancti Deus, per omnia sæcula sæculorum. *R.* Amen.

Et si hic tantum Ordo conferatur, admonet eum ut supra pag. 241. sedens cum mitra.

Si vero plures uni tantum Ordines fuerint collati, illum alloquitur, ut infra post Ordinationem Acolythy.

### DE ORDINATIONE EXORCISTÆ.

Pro Exorcista paretur liber Exorcismorum, cujus loco dari potest Pontificale, vel Missale.

**P**ONTIFICE in faldistorio ante medium altaris posito sedente cum mitra, vocatur Exorcista per Archidiaconum, aut alium, modo consueto:

Accedat qui ordinandus est ad Officium Exorcistarum.

Mox illum per Notarium, ut supra, nominatum, et coram Pontifice genuflexum admonet Pontifex, dicens:

**O**RDINANDUS, fili charissime, in officium Exorcistarum, noscere debes quid suscipis. Exorcistam etenim oportet abjicere dæmones, et dicere populo, ut, qui non communicat, det locum; et aquam in ministerio fundere. Accipis itaque potestatem imponendi manum super energumenos; et per impositionem manuum tuarum, gratia Spiritus sancti et verbis exorcismi, pelluntur spiritus immundi a corporibus obsessis. Stude igitur, ut sicut a corporibus aliorum dæmones expellis, ita ab animo tuo et corpore omnem immunditiam et nequitiam ejicias; ne illi succumbas, quem ab aliis tuo effugas ministerio. Disce per officium tuum vitiiis imperare, ne in tuis moribus aliquid sui juris inimicus valeat vindicare.



Tunc etenim recte in aliis dæmonibus imperabis, cum prius in tempore eorum omnimodam superas nequitiam: quod tibi Dominus agere concedat per Spiritum suum sanctum.

Post hæc Pontifex accipit, et tradit ei librum Exorcismorum, vel illius loco Pontificale, seu Missale, et dum Ordinandus librum tangit manu dextera, dicit Pontifex:

Accipe, et commenda memoriæ, et habe potestatem imponendi manus super energúmenos, sive baptizatos, sive catechúmenos.

Mox surgit Pontifex, et stans cum mitra conversus ad illum adhuc genuflexum, dicit:

**D**EU M Patrem omnipotentem, fratres charissimi, suppliciter deprecemur, ut hunc famulum suum benedicere dignetur in officium Exorcistarum: ut sit spiritalis imperator ad abigendos dæmones de corporibus obsessis, cum omni nequitia eorum multifórmi. Per unigenitum Filium suum Dominum nostrum Jesum Christum, qui cum eo vivit et regnat in unitate Spiritus sancti Deus, per omnia sæcula sæculorum. *ñ.* Amen.

Tum conversus ad altare, deposita mitra, dicit: Orémus.

Et ministri subdunt: Flectámus genua. *ñ.* Leváte.

Et convertens se ad Ordinatum genuflexum, dicit:

**D**OMINE sancte, Pater omnipotens, æternæ Deus, benedicere dignare hunc famulum tuum in officium Exorcistarum: ut per impositionem manuum et oris officium, potestatem et imperium habeat spiritus immundos coercendi, ut probabilis sit medicus Ecclesiæ tuæ grátia curationum virtutisque cœlesti confirmatus. Per Dominum nostrum Jesum Christum Filium tuum, qui tecum vivit et regnat in unitate Spiritus sancti Deus, per omnia sæcula sæculorum. *ñ.* Amen.

Et si hic tantum Ordo conferatur, admonet eum ut supra pag. 240. dictum est, sedens cum mitra.

Si vero plures minores Ordines eidem collati fuerint, Pontifex hortatur illum ut infra post collationem Acolythatus.

### DE ORDINATIONE ACOLYTHI.

Pro Acolyθο parentur Candelabrum cum cereo extincto, et urceolus pro vino vacuus.

**P**ONTIFEX in faldistorio ante medium altaris, reasumpta mitra, sedet; tum Archidiaconus, vel alius locum ejus tenens, Acolythum vocat, dicens: Accedat qui ordinandus est ad officium Acolythorum.

Mox illum nominatum, ut supra, et genuflexum, admonet Pontifex, dicens:

**S**USCEPTUS, fili charissime, officium Acóllythi, pensa quod suscipis. Acóllythum etenim oportet ceroferrarium ferre, luminaria Ecclesiæ accendere, vinum et aquam ad Eucharistiam ministrare. Stude igitur susceptum officium digne implere. Non enim Deo placere poteris, si lucem Deo manibus præferens, operibus tenebrarum inservias, et per hoc aliis exempla perfidiæ præbeas. Sed juxta quod Veritas dicit: Luceat lux tua coram hominibus, ut videant opera tua bona, et glorificent Patrem tuum qui in cœlis est. Et secundum quod ait Apóstolus Paulus: In médio nationis pravæ et perversæ luceas sicut luminare in mundo, verbum vitæ continens. Sint ergo lumbi tui præcincti, et lucernæ ardentes in manibus tuis, ut sis filius lucis. Abjicias opera tenebrarum, et induaris arma lucis. Eras etenim



aliquándo ténebræ, nunc autem lux in Dómino, ut filius lucis ámbula. Quæ sit vero ista lux, quam tantópere incúleat Apóstolus, ipse demónstrat, subdens : Fructus enim lucis est, in omni bonitáte, et justítia, et veritáte. Esto igitur solícitus, in omni justítia, bonitáte et veritáte, ut te, et álios, et Dei Ecclesiám illumines. Tunc etenim in Dei sacrificio digne vinum súggeres et aquam, si tu ipse Deo sacrificium per castam vitam et bona ópera oblátus fúeris : quod tibi Dóminus concédatur per misericórdiam suam.

Post hæc accipit et tradit Pontifex Acolytho candelabrum cum candela extincta, quod ipse manu dextera tangit, Pontifice dicente :

Accipe ceroférarium cum céreo, et scias te ad accendénda Ecclesiæ luminária mancipári, in nómine Dómini. *R.* Amen.

Tum accipit et tradit ei urceolum vacuum, quem similiter tangere debet Acolythus, et dicit Pontifex :

Accipe urceolum, ad suggeréndum vinum et aquam in Eucharistíam Sánguini Christi, in nómine Dómini. *R.* Amen.

Postea stans Pontifex cum mitra versus ad eum genuflexum, dicit :

**D**EUM Patrem omnipoténtem, fratres charíssimi, suppliciter deprecémur, ut hunc fámulum suum bene *X* dicere dignétur in órdine Acolythórum : quátenus lumen visibile mánibus præferens, lumen quoque spirituále móribus præbeat. Adjuvánte Dómino nostro Jesu Christo, qui cum eo et Spíritu sancto vivit et regnat Deus, per ómnia sæcula sæculórum. *R.* Amen.

Tum Pontifex, deposita mitra, convertit se ad altare, et stans dicit : Oremus.

Et ministri dicunt : *F*lectámus génuá. *R.* Leváte.

Et mox conversus ad Acolythum genuflexum, subdit :

**D**OMINE sancte, Pater omnipotens, ætérne Deus, qui per Jesum Christum Filium tuum Dóminum nostrum, et Apóstolos ejus, in hunc mundum lumen claritátis tuæ misisti, quique ut mortis nostræ antiquum aboléres chirógraphum, gloriosíssimæ illum Crucis vexillo affigi, ac sánguinem et aquam ex látere illius pro salúte géneris humáni effluere voluisti, bene *X* dicere dignáre hunc fámulum tuum in officium Acolythórum, ut ad accendéndum lumen Ecclesiæ tuæ, et ad suggeréndum vinum et aquam ad conficiéndum Sánguinem Christi Filii tui in offerénda Eucharistía sanctis altáribus tuis fidéliter subministret. Accénde, Dómine, cor ejus et mentem ad amórem grátie tuæ, ut illuminátus vultu splendóris tui, fidéliter tibi in sancta Ecclesiá desérviat. Per eúmdem Christum Dóminum nostrum. *R.* Amen.

OREMUS.

**D**OMINE sancte, Pater omnipotens, ætérne Deus, qui ad Moysen et Aaron locútus es, ut accenderéntur lucérnæ in tabernáculo testimónii : bene *X* dicere dignáre hunc fámulum tuum, ut sit Acólythus in Ecclesiá tua. Per Christum Dóminum nostrum. *R.* Amen.

OREMUS.

**O**MNIPOTENS sempitérne Deus, fons lucis, et origo bonitátis, qui per Jesum Christum Filium tuum, lumen verum, mundum illuminásti, ejúsque passiónis mystério redemísti : bene *X* dicere dignáre hunc fámulum tuum, quem in officium Acolythórum consecrámus, poscéntes cleméntiam tuam, ut ejus mentem et lumíne sciéntiæ illústres, et pietátis tuæ rore irriges; ut ita accéptum ministérium, te auxiliánte, péragat, quáliter ad ætérnam remuneratióem pervenire mereátur. Per eúmdem Christum Dóminum nostrum. *R.* Amen.



Deinde, si Ordinatio peracta fuerit extra Missam, Pontifex, accepta mitra, sedet; et ad minores Ordines promotum monet, ut infra: si vero intra Missam, post datam benedictionem sedens cum mitra, eum tunc alloquitur:

**F**ili dilectissime, diligenter considera Ordines per te susceptos, ac onus humeris tuis impositum; stude sancte et religiose vivere, atque omnipotenti Deo placere, ut gratiam suam possis acquirere, quam ipse tibi per suam misericordiam concedere dignetur.

Dic semel septem Psalmos poenitentiales cum Litanis, Versiculis, et Orationibus, et omnipotentem Deum etiam pro me ora.

Quod ille devote suscipit, et promittit se facturum. Tandem, si collatus fuerit hic tantum Ordo, admonet eum ut supra pag. 240.

---

#### DE ORDINATIONE SUBDIACONI.

Pro subdiacono parentur Calix vacuus cum Patena superposita similiter vacua, urceoli vino et aqua pleni super pelliculam, una cum manutergio, et liber Epistolarum;

Parentur etiam Hostia parva, et velum oblongum coloris albi pro Communione.

**P**ONTIFEX omnibus paramentis pontificalibus coloris temporis, et officio convenientis pro Missa necessario celebranda, indutus, ut Subdiaconatus Ordinem conferat in Missis de Quatuor Temporibus, dicta quinta Lectione: in Missis vero et Sabbatis ante Dominicam Passionis, aut Resurrectionis Domini, aut, ex

dispensatione Apostolica, in Missis de festivo die duplici, vel de Dominicis, dicta Collecta cum Oratione pro Ordinandis sub una conclusione: et factis Commemorationibus, si quæ sint faciendæ; accedit cum mitra, ad faldistorium ante medium altaris sibi paratum, et sedet.

Et si fuerit extra Tempora, antequam ad collationem Ordinis procedatur, legitur mandatum Apostolicum, sive supplicatio, ejus vigore eidem Pontifici facultas conceditur ordinandi; quibus lectis, dicit Pontifex Deo gratias, et ad ordinationem procedit.

Tum Archidiaconus, aut illius locum tenens, vocat Ordinandum, et dicit:

Accedat qui ordinandus est Subdiaconus.

Deinde Notarius sub una ex triplici formula convenienti eum vocat, dicens:

N. ad titulum Ecclesiæ N. vel N. ad titulum patrimonii sui. vel Frater N. professus Ordinis N. ad titulum paupertatis.

Ordinandus vero, quisquis sit, respondet: Adsum, et accedit versus Episcopum, quem profunda reverentia salutatur.

Debet autem Ordinandus in Subdiaconum indutus esse amictu (non tamen super caput, sed ita circa collum dimisso, ut facile possit supra cervicem reduci); item alba, et cingulo: habere etiam debet manipulum in manu sinistra, tunicellam coloris albi super brachio item sinistro, et candelam in manu dextera.

Eum itaque sic paratum competenti spatio coram Pontifice stantem, ille cum mitra sedens admonet, dicens:

**F**ili dilectissime, ad sacrum Subdiaconatus Ordinem promovendus, iterum atque iterum considerare debes attente, quod onus hodie ultro appetis. Hactenus enim liber es, licetque tibi pro arbitrio ad sæcularia



vota transire; quod si hunc Ordinem suscéperis, amplius non licébit a propósito resilire, sed Deo, cui servire regnare est, perpétuo famulari; et castitatem, illo adjuvante, servare oportébit, atque in Ecclesiæ ministério semper esse mancipatum. Proinde, dum tempus est, cogita, et si in sancto propósito perseverare placet, in nómine Dómini huc accéde.

Hæc admonitio non fit Religiosis.

Illo tunc accedente, et genua flectente coram Pontifice, si sit alius ad altiorem Ordinem promovendus, Archidiaconus vocat eum, dicens :

Accédât qui ordinandus est Diáconus vel Présbyter.

Mox Subdiaconandus super tapete se prosternit contra cornu Evangelii altaris, facie altari versa; Diaconandus autem, si adsit, contra cornu Epistolæ; et Presbyterandus contra medium altaris, faciebus similiter altari versis. Pontifex vero cum mitra super pulvinum genuflectit ante faldistorium, et schola inchoat, vel si officium fiat sine cantu, Pontifex ipse incipit Litanias dicens : Kyrie eléison, ut supra 15., proseguendo totas de more, genuflexis respondentibus ministris :

Postquam autem dictum fuerit,

Ut ómnibus fidelibus defunctis, etc.

ñ. Te rogámus audi nos.

Pontifex surgit cum mitra, et baculum Pastoralem in sinistra tenens, conversus ad Ordinandum, si fuerit solus, dicit :

Primo.

Ut hunc Eléctum bene ✠ dicere dignéris.

ñ. Te rogámus audi nos.

Secundo.

Ut hunc Eléctum bene ✠ dicere, et sancti ✠ ficare dignéris.

ñ. Te rogámus audi nos.

Tertio.

Ut hunc Eléctum bene ✠ dicere, sancti ✠ ficare, et conse ✠ crare dignéris.

ñ. Te rogámus audi nos.

Si autem pluribus diversos Ordines conferat Pontifex, supradictam benedictionem dabit in plurali, dicens :

Primo.

Ut hos Eléctos bene ✠ dicere dignéris.

ñ. Te rogámus audi nos.

Secundo.

Ut hos Eléctos bene ✠ dicere, et sancti ✠ ficare dignéris.

ñ. Te rogámus audi nos.

Tertio.

Ut hos Eléctos bene ✠ dicere, sancti ✠ ficare, et conse ✠ crare dignéris.

ñ. Te rogámus audi nos.

Deinde reddito baculo Pastoralis, rursus ante faldistorium genuflectit Pontifex, et perficiuntur Litanie. Ut nos exaudire, etc.

Quibus finitis, surgens Pontifex cum mitra sedet ut supra : si vero sit aliquis alius intra eadem Missarum solemnias Ordinandus, alta voce dicit Archidiaconus, aut Capellanus vices illius gerens :

Recédât in partem qui ordinandus est Diáconus, vel Présbyter.

Tum Pontifex Subdiaconandum ante se genuflexum admonet, dicens :

ACCEPTURUS, fili dilectissime, officium Subdiaconatus, sédulo atténde quale ministérium tibi tráditur. Subdiaconum enim opórtet aquam ad ministérium altaris preparare, Diácono ministrare, pallas altaris et corporalia abluere, Cálicem et Paténam in usum Sacrificii eidem offerre. Oblationes quæ véniunt in altare, panes



Propositionis vocantur : de ipsis oblationibus tantum debet in altari poni, quantum populo possit sufficere, ne aliquid putridum in Sacratio remaneat. Pallæ, que sunt in substratorio altaris, in alio vase debent lavari, et in alio corporales pallæ. Ubi autem corporales pallæ lotæ fuerint, nullum aliud linteamen debet lavari, ipsaque lotionis aqua in Baptistarium debet vergi. Stude itaque ut ista visibilia ministeria, quæ diximus, nitide et diligentissime complens, invisibilia horum exemplo perficias. Altare quidem sanctæ Ecclesiæ ipse est Christus, teste Joanne, qui in Apocalypsi sua altare aureum se vidisse perhibet stans ante thronum, in quo, et per quem oblationes fidelium Deo Patri consecrantur. Cujus altaris pallæ et corporalia sunt membra Christi, scilicet fideles Dei, quibus Dominus, quasi vestimentis pretiosis, circumdatur, ut ait Psalmista : Dominus regnavit, decorem indutus est. Beatus quoque Joannes in Apocalypsi vidit Filium hominis præinctum zona aurea, id est, Sanctorum caterva. Si itaque humana fragilitate contingat in aliquo fideles maculari, præbenda est a te aqua cælestis doctrinæ, qua purificati, ad ornamentum altaris, et cultum divini Sacrificii redeant. Esto ergo talis, qui Sacrificiis divinis, et Ecclesiæ Dei, hoc est, Corpori Christi, digne servire valeas, in vera et Catholica fide fundatus, quoniam, ut ait Apostolus : Omne quod non est ex fide, peccatum est, schismaticum est, et extra unitatem Ecclesiæ est. Et ideo, si usque nunc fuisti tardus ad Ecclesiam, amodo debes esse assiduus. Si usque nunc somnolentus, amodo vigil. Si usque nunc ebriosus, amodo sobrius. Si usque nunc inhonestus, amodo castus : quod ipse tibi præstare dignetur, qui vivit et regnat Deus in sæcula sæculorum. *R.* Amen.

Deinde Pontifex adhuc sedens accipit, et Ordinando Calicem vacuum tradit cum Patena vacua superposita, quem ille manu dextera tangit, Pontifice interim dicente :

Vide cujus ministerium tibi traditur : ideo te admoneo ut ita te exhibeas, ut Deo placere possis.

Et Archidiaconus, vel illius vices gerens, accipit, et tradit ei urceolos cum vino et aqua, ac bacile cum manutergio; quæ omnia similiter Ordinandus tangere debet.

Postea surgit Pontifex, et versus ad populum stans cum mitra, dicit :

**O**REMUS Deum, ac Dominum nostrum, fratres charissimi, ut super hunc servum suum, quem ad Subdiaconatus officium vocare dignatus est, infundat bene *✠* dictionem suam et gratiam : ut in conspectu ejus fideliter serviens, prædestinata Sanctis præmia consequatur. Adjuvante Domino nostro Jesu Christo, qui cum eo vivit et regnat in unitate Spiritus sancti Deus, per omnia sæcula sæculorum. *R.* Amen.

Tum, deposita mitra, conversus ad altare Pontifex, dicit : *Oremus.*

Et ministri subdunt : *Flectamus genua. R.* Levate.

Mox Pontifex versus ad Ordinandum genuflexus, dicit, sine mitra :

**D**OMINE sancte, Pater omnipotens, æternæ Deus, bene *✠* dicere dignare hunc famulum tuum, quem ad Subdiaconatus officium eligere dignatus es : ut eum in sacratio tuo sancto strenuum sollicitumque cælestis militiæ instituas excubitorem, sanctisque altaribus tuis fideliter subministret, et requiescat super eum Spiritus sapientiæ, et intellectus, Spiritus consilii et fortitudinis, Spiritus scientiæ et pietatis, et repleas eum Spiritu timoris tui; et eum in ministerio divino confirmes, ut obediens facto, ac dicto parens, tuam gratiam consequatur. Per Dominum nostrum Jesum Christum Filium tuum, qui tecum vivit et regnat in unitate ejusdem Spiritus sancti Deus, per omnia sæcula sæculorum. *R.* Amen.



Tum Pontifex, sedens cum mitra, accipit amictum qui in collo Ordinandi jacet, imponitque super caput ejus, dicens :

Accipe amictum, per quem designatur castigatio vocis :  
In nomine Pa ✠ tris, et Fi ✠ lii, et Spiritus ✠ sancti.  
R̄. Amen.

Tum immittit Pontifex manipulum in sinistrum brachium ejusdem, dicens :

Accipe manipulum, per quem designantur fructus bonorum operum : In nomine Pa ✠ tris, et Fi ✠ lii, et Spiritus ✠ sancti. R̄. Amen.

Post hæc Tunica illum totaliter induit, dicens :  
Tunica jucunditatis, et indumento lætitiæ induat te Dominus : In nomine Pa ✠ tris, et Fi ✠ lii, et Spiritus ✠ sancti. R̄. Amen.

Tandem tradit illi librum Epistolarum, quem tangit manu dextera, dicente interim Pontifice :  
Accipe librum Epistolarum, et habe potestatem legendi eas in Ecclesia sancta Dei, tam pro vivis, quam pro defunctis : In nomine Pa ✠ tris, et Fi ✠ lii, et Spiritus ✠ sancti. R̄. Amen.

His peractis, Archidiacono suggerente, Subdiaconus surgit, et facta Pontifici profunda reverentia, redit ad locum suum, et genuflectit. Tum Pontifex surgit, et accedit, si Missa legatur, ad cornu Epistolæ, ubi, deposita mitra, illam prosequitur : si vero Missa dicatur in cantu, vadit ad sedem seu ad faldistorium; et suo loco, et tempore a Subdiacono novo cantatur Epistola; et si adsit aliquis alius, confert Diaconatum vel Presbyteratum, ut infra.

Lecto autem Offertorio, Pontifex, accepta mitra, in faldistorio, ante medium altaris posito, sedet : mox Subdiaconus candelam accensam dextera sustinens, sinistra pectori admota, accedit; tum facta Pontifici profunda reverentia, genuflectit, ejusque manum dexteram,

dum tradit candelam, osculatur : deinde surgit, et facta iterum reverentia, redit ad locum suum. Facta Oblatione, Pontifex annulum et chirothecas deponit, et lotis manibus, resumit annulum, et surgit : sublatoque faldistorio, accedit ante medium altaris, ubi, deposita mitra, prosequitur Missam; Secreta diei dicitur cum Secreta pro Ordinato sub unico Per Dominum, etc. non omissis aliis Secretis, quæ sint dicendæ.

Dum Pontifex dicit Orationem, Domine Jesu Christe, qui dixisti, etc. Subdiaconus accedit ad dexteram Pontificis, et Oratione dicta, uterque simul osculatur altare; Subdiaconus tamen non ponit manus super altare, sed eas ante pectus plicatas retinet, (quod et de Diacono intelligendum est) et conversa facie ad invicem, Pontifex dat osculum pacis Subdiacono, dicens : Pax tecum. Cui ille respondet : Et cum spiritu tuo. Tum Subdiaconus, facta ante et post profunda reverentia Pontifici, et genuflexione SS. Sacramento, vadit ad locum suum.

Postquam vero Pontifex se communicaverit, et totum Sanguinem sumpserit, priusquam se purificet, Palla Calix tegitur, et ultra medium Corporalis ex parte Evangelii, non extra ipsum, collocatur. Tum Pontifex supponit Patenam Hostiæ, qua communicandus est Ordinatus; qui ante medium altaris accedens, genuflexus dicit intelligibili voce : Confiteor Deo, etc. quo absoluto, Pontifex, facta genuflexione SS. Sacramento, surgit et aliquantulum se retrahit ad cornu Evangelii; et versus ad Ordinatam, junctis manibus, dicit, licet unicus sit communicandus : Misereatur vestri omnipotens Deus, et dimissis peccatis vestris, perducat vos ad vitam æternam. R̄. Amen. Indulgentiam, ✠ absolutiõnem, et remissionem peccatorum vestrorum tribuat vobis omnipotens et misericors Dominus. R̄. Amen.

Tum accedit Ordinatus ad supremum altaris gradum, ubi genuflexus, et communicaturus mappulam recipit; Pontifex vero versus ad altare, facit genuflexionem



SS. Sacramento; deinde surgens, sinistra Patenam, dextera vero Hostiam reverenter accipit, quam aliquantulum elevatam tenet super Patenam, et conversus ad Ordinatam in medio altaris, dicit:  
 Ecce Agnus Dei, ecce qui tollit peccata mundi.

Mox ter subjungit:  
 Dómine, non sum dignus, ut intres sub tectum meum: sed tantum dic verbo, et sanábitur ánima mea.

Et accedens, Ordinato porrigit SS. Sacramentum, faciens cum eo signum crucis super Patenam, et simul dicens:

Corpus ✠ Dómini nostri Jesu Christi custódiat te in vitam aetérnam. Et Ordinatus respondens Amen. manum Pontificis Hostiam tenentem osculatur, et communionem reverenter sumit, ori ejus supposita Patena. Deinde unus ministrorum purificat illum Calice, aut alio vase cum vino ad hoc destinato; et cum Ordinatus os ad mappulam exterserit, redit ad locum suum.

Hæc omnia simili modo servabuntur in Ordinatione Diaconi, si ipse solus fuerit ordinatus.

Communionem peracta, Pontifex colligit fragmenta cum Patena, quam super Calicem suum extergit, et purificationem sumit, cum digitorum ablutione; quo facto, mitram accipit, et lavat manus, quibus extersis, statim deposita mitra, stans in cornu Epistolæ, Missam prosequitur, Postcommunionem diei Ordinati Postcommunionem adjuneta; sub uno Per Dóminum, nec omittit alias, si quæ faciendæ sint, Commemorationes.

Data Benedictione, ut moris est, et reddito baculo Pastoralis, sedet Pontifex in faldistorio ante medium altaris posito: mox Ordinatus accedit, qui, facta profunda Pontifici reverentia, genuflectit; tum his verbis Subdiaconum aut Diaconum alloquitur Pontifex, dicens:

**F**ILI dilectissime, diligenter considera Ordinem per te susceptum, ac onus húmeris tuis impósitum: stude

sancte et religiósè vivere, atque omnipoténti Deo placere, ut grátiam suam possis acquirere, quam ipse tibi per misericórdiam suam concedere dignétur. Ad Subdiaconátum (vel ad Diaconátum) ordináte, dic Noctúrnium talis diei; et omnipoténtem Deum étiam pro me ora.

Quod ille reverenter suscipit, ac promittit se facturum. Attamen, si pluribus unicuique diversus Ordo delatus fuerit, admonet eos simul, ut habetur infra, expleta Ordinatione Presbyteri.

Tum surgit Pontifex, et amoto faldistorio, convertit se ad cornu Evangelii, ubi, deposita mitra, dicit: Dóminus vobiscum. Deinde, Intium sancti Evangelii secundum Joánnem. In principio erat Verbum; et signat tabellam in qua est Evangelium; aut (si deficiat) signat altare et se. Mox acceptis mitra et baculo, prosequitur, factaque Cruci debita reverentia in infimo gradu altaris, revertitur ad sedem suam, vel ad faldistorium, ubi exiit sacris vestibus. Si vero aliud Evangelium sit dicendum, illud in cornu Evangelii totum legit, eoque dicto, recedit ut prius.

## DE ORDINATIONE DIACONI.

Pro Diacono paretur liber Evangeliorum; Hostia parva, ac velum album pro Communionem.

**P**ONTIFEX omnibus paraméntis pontificalibus, coloris tempore et officio convenientis, ad Missam necessario celebrandam indutus, ut Ordinationem Diaconatus conferat, in Dominicis, aut festivis diebus ex dispensatione apostolica, aut statutis a jure temporibus, dicta Oratione diei cum sequenti collecta pro Ordinando: